

四庫全書

集部

欽定四庫全書

集部

漢濱集卷十二

詳校官起居注主事臣顧宗泰

主事臣呂雲棟覆勘

謄錄貢生臣苗序濂

欽定四庫全書

漢濱集卷十一

宋 王之望 撰

啟

通鄭資政啟

泰山北斗久崇道德之高白日青天未快儀型之覩望
台符之兩兩懸風旆以搖搖顧姓名嘗掛於齒牙則書
記宜攄於肝膽輒效小人之竿牘自通夫子之門牆流
水高山或賞音之可遇夜光明月如按劍以奚憂願明

晞驥之心弗拒躍螽之懇恭惟某官才優王佐學擅儒宗世濟美以傳芳天生賢而瑞聖守韋平之經藝自取殊科振王謝之家聲荐躋華貫出入鳴珂之里翱翔持橐之班文采風流望高當代論思獻納寵冠邇聯夙懷經濟之心適際艱難之運十年險阻一節始終守義奮忠知疾風於勁草釋紛解難游利器於盤根信行蠻貊之邦氣吐虹蜺之上卒柔勁敵並締歡盟寬萬乘宵旰之憂復九重宸昏之養魏絳和戎而利晉較力非難子

貢霸越而亡齊論功孰大計安海寓勲在旂常俄陞秘
殿之嚴仍秩輔臣之峻錫膏腴於樂土奉香火於殊庭
用均出處之勞益養弼諧之望和合二國已賴鄧芝之
功鎮撫四夷將奉陳平之對未拜鼎梅之命忽纏風木
之悲朝廷暫失於倚毗聖主深憂其毀瘠高士致生芻
之弔門人廢蓼莪之篇忠孝兩全身名俱泰雖縲麻有
制方深追遠之思然金革未消佇下奪情之詔勉辭苦
塊入正台衡用承夾輔之盟大振中興之烈其儒冠寒

金少曰... 卷十一
士侯泮冷官素潛附鳳之心終冀登龍之幸鷄鳴狗盜
倘容下座之收蟲臂鼠肝久藉大鈞之播巖凝在候追
慕難堪願少抑於孝思用仰酬於睿眷

謝及第啟

階任子之恩已更賤役應興賢之詔復忝巍科循鄙分
以非宜撫踈才而自愧竊以國家惟百年之計留意人
才學者以一日之長致身科目凡彼公卿之蹊徑悉由
文字以權輿始類浮文終收實用遂使清朝篤意謂糊

名較藝之足憑後進希聲以射策決科為可貴故此艱
難之際亦嚴搜選之方神州尚隔於一隅江表自稱為
多士雖未復限淮之地亦不虛造榜之天方三祀之亮
陰肅九重而恭默龍池輟試將權衡於近侍之臣鴈塔
書名等甲乙於春官之考訓辭甚切聖意有加精求賦
日之才博采濟時之畧謹其聲律蓋將觀組織之工訪
以古今所以考經綸之術自非詞兼衆體才擅數長則
何以副睿哲之旁求處英賢之上列如某者衣冠寒族

庠序晚生無博觀廣覽之資有孤陋寡聞之累專心弱
歲攻書劍以徒勞刻意前修佩韋弦而自飭妄起功名
之意早遊教化之原博士一經生徒數載月程文藝屢
收得雋之功秋試賢能亦在先鳴之列自詭穿楊之審
不知拾芥之難龍門未躍於西河鯨鬣遂掀於東海合
縑以出彈鋏而歸繼纏風樹之悲無復星槎之興十年
兵火脫患難於中原萬里風波從衣冠而南渡講道於
絕糧之際談經於弛擔之餘素患難以安行嘗險艱而

已備偶緣世賞獲厠官聯鐵違鑄硯之心金負滿籬之
訓絕意冥鴻之寥廓甘心斥鷃之翱翔然素業傳家懼
弓冶箕裘之墮青衫入仕有塵埃筭楚之羞痛自激昂
載加勉勵家無文史重興五厄之嗟官有簿書更苦三
餘之寤心耗於囊中之句目昏於檠下之書過時已覺
於難成中道幾思於自畫向用朝廷之事比許還首善
之薦名來求禮部之選掄偶犯有司之程度霜蹄遂蹶
劍氣空呈復垂翅於回谿獨倚輶於虞阪功同猿臂疑

骨相之難封命肖龍章恨神仙之多障有求弗獲欲罷不能屬詔綽之肆頒厲辭鋒而再鼓既與漕臺之計復觀王國之光朋來集四海之英穎出盡一時之秀時方用賦皆升堂入室之流士必通經多專門名家之學玉有荆山之韞珠無滄海之遺可謂盛哉吁足畏也方錙銖之必較忽糠粃以居前然而求劍刻舟守舊方而甚滯好竽鼓瑟追時尚以尤疎文或病其雕蟲技幾成于畫虎既瑕瑜之不掩宜葑菲之俱遺何圖翫觝之詞猶

玷公明之選人非東晉莫與劉琰之流賦異阿房終居
杜牧之下尚次甲科之後獲塵乙夜之觀自揣奇窮已
為僥倖此蓋伏遇某官才高人傑道契天民以兼資文
武之才膺注意安危之寄計存廟社威名獨重於朝端
位冠臣隣風采想聞於天下久持魁柄力運化樞折遐
衝於敵人窺伺之秋鎮雅俗於國勢危疑之日臨大事
而不亂蓋宵中之氣有餘推至公而必行故宇內之心自
服國有中興之漸士無先識之憂致此庸虛有茲叨冒

其敢不益崇儒行勉服官箴隨所遇於他時期粗伸於
素志被君相作人之澤雖匪成才師聖賢行己之方則
為報德

上孫承旨啟

光奉制書復登翰苑承中禁幾微之旨冠內朝清切之
班傳聞四遐聳動羣聽竊以北門待詔專取文章東閣
別居必推年德將相相望於前世官資不計於同僚在
中朝熙洽之時特為榮遇逮南渡艱難之後無復常員

自非大用之資曷副久虛之選恭惟某官斯文哲匠當代
者英疎通既稟於天資練達尤深於世務清塗揚歷閱
歲月於三朝絕域征行冒風霜於萬里夷險不渝於一
節身名由是以俱榮入掌絲綸出專斧鉞詔令繼兩京
之作威權侔二陝之分屬睿哲之求賢思老成而共政
鋒車馳名屢趣舍人之裝黼座對揚遂前天子之席方
今台階未備政路多虛濟時實藉於真才注意允歸於
舊德名書案上聞宸翰之親題禮絕座中有禁林之故

事某叨蒙慰薦粗識依歸峻比龍門已濫登於賤跡成
同燕厦惟竊賀於私心

賀孫參政啟

進用真儒入參大政綸言誕布隱然國勢之隆輿論僉
諧赫爾民瞻之峻庇庥所及慶忭交深竊觀前世之興
衰皆係大臣之能否誠得賢輔必收雋功未有用無奇
之人而可辦非常之事又况聖哲馳騫之日非如國家
閒暇之時宗廟社稷之安危動闕舉措錢穀兵甲之繁

冗密備咨詢自非希世之才曷展經邦之略天厭禍亂
國登俊良恭惟某官道備弛張學窮治忽發為華藻蔚
乎兩漢之文養以淵源粹矣六經之蘊法律淹通於三
尺憲章練達於累朝得其一長已足名世至於大節則
又絕人曩勅敵之始通擇邇臣而往聘敵心不測物議
交疑方衆人相視莫敢請行之間獨匹馬徂征出不反
顧之計信義行乎殊俗忠勤簡於清衷位貌寢隆寵靈
甚渥雍容玉帳兩專方嶽之權出入金鑾三奉禁林之

直比載膺於圖任遂亟被於登庸以將降大任之資迪
紹開中興之烈君臣同德協際會於風雲中外傾心望
昇平於朞月某受知特達聞命欣愉頌聖主之得賢臣
愧無妙語以儒宗而居相位更俟嘉音寒律方嚴恩光
尚遠期精加於調護用宏濟於艱難

與閭丘侍郎問候啟

到廣文之官舍誰慰棲遲侍夫子之門牆獨叨顧盼間
振衣而造請每吐哺以逢迎仰侍儀刑永壺瑩坐側聆

警效玉塵生風照落月之滿梁話朝陰而改砌方幸悒
矇之借忽驚蔡戟之遙雖羽毛切賀厦之心而駑蹇深
戀軒之意台符乍遠時律俄更屬蓮幕以初開諒鈴齋
之有暇中和布政豈弟宜民熙雅俗以交歡納多祥而
擁茂恭惟某官天和毓秀星緯儲精挺資質於瓊瑤粹
靈襟於珠玉才非近用許身稷契之間學邁前修勵志
淵騫之上曩一同之宣化已三異以馳英繡衣遽以其
名聞黼座亟嗟於見晚擢司糾察特高御史之聲入總

彌綸尤善都公之職俄膺帝制進貳天官藻鑑無私銓
衡有叙身持荷橐驟登法從之嚴名覆金甌將秉事樞
之重忽厭承明之直暫從真館之游衣畫錦以榮歸醉
仙霞而均逸比膺明命起鎮大邦卓蓋朱轡引安輿而
就道金章紫綬映綵服以趨庭里巷矜榮搢紳豔美惟
永嘉之故郡有康樂之遺風冠蓋連雲閭閻匝地屬車
所次曾紆警蹕之臨原廟斯存久肅衣冠之奉委茲重
寄必屬名臣果中詔以明揚分左符而顯授班春慰俗

來暮興謠坐恢安靜之風益勵廉平之素宣十行而撫
衆愁歎消聲持三尺以繩姦貪饗屏迹聞訟棠而敷蔭
哦夢草以搜竒治行流聞頌聲間作報政遂先於齊魯
賜書豈後於龔黃卧閣多閒應爛賞雁山之勝造朝伊
邇行趣歸鳳閣之中某日戀三升月糜五斗徒抱漳濱
之疾莫陪池上之吟望履未期遠借慶雲之庇彈冠何
晚終希宵燭之光朱夏啟辰薰風入奏願益綏於玉體
用下副於巖瞻

除太學錄謝宰相啟

脫選調之塵埃初更祿秩錄成均之攷法忽冒除書揣
已何堪就官有覩我國家觀人文而化天下度絕前聞
建首善而自京師實由內始逮華戎之多故痛庠序之多
隳天之未喪斯文俄臻偃革物不可以終否復觀迺衡
聖賢相逢而治具張財力有餘而頌聲作乃依行所肇
闢賢關規模還列聖之容警蹕來九天之上譽髦雲集
聲教馳爰遶簡於師儒俾講明於經術仍分正錄用

糾生徒雖取法先王本詩書禮樂以造士然更資大器
執規矩準繩而治人宜得名流以諧清議如某者稟才
至薄涉世尤疎謬傳箕冶弓裘之餘無復師友淵源之
自策名一第嗟壯歲之已過隨牒四方悵譎能之無補
一行泮水三變周星仕有時為貧本作斗升之計教然
後知困慙無尺寸之長比及終更偶容善去顧無德而
富貴早已灰心惟有道之賤貧未能雪恥勉從銓課遂
忝京僚方徒勞州縣之間甘為俗吏何樂育人材之地

遂並英游此蓋伏遇某官仁濟含生功超振古恥堯舜
之不及至周召而乃留保乂王家克端命於上帝會紹
乃辟用追孝於前人致萬物以得宜無一夫之不獲至
如孱陋尤困奇窮貌醜心妍利居衆後髮禿齒豁不見
已知與其掉乞憐之尾而僥倖於他人曷若由中正之
塗而投誠於吾相式下靈輦之鈞靡資蟠木之容草光
範之書無煩三獻開翹材之館亟納孤蹤軫其從宦之
清貧授以為文之要體大鈞所播至鑑難逃蒙厚德以

如斯殞微軀而何有某敢不恪共爾位終始其躬當任
賢使能之朝既塵公舉堅仗節死義之守必報私恩

賀樓樞密啟

光膺寵綽越執洪樞還居政府之嚴隱如敵國坐使朝
廷之勢安若泰山將士交欣搢紳胥慶竊以先王之制
兵刑出於一原有國之經文武號為二柄掌其政令宜
在廟堂逮軍民之既分致將相以異任典戎事者罔陪
於國論代天工者弗與於兵權注意既殊全功曷責國

家開重熙之景運仍五季之舊章爰建輔臣以司兵本
稽於古實六卿司馬之職考其官蓋三事大夫之聯地
亞鈞衡謀專帷幄必得腹心之佐始膺體貌之隆矧今
大難已平中興伊始雖干戈倒載永無征戰之虞而樽
俎折衝允藉威懷之畧自非上哲曷副旁求恭惟某官
資粹誠明學窮治忽沈深大度量莫見於津涯厚重寡
言色不形於喜愠凜凜萬夫之望堂堂千載之英出入
三朝險夷一節曩緣對境許締和盟方善意之未孚致

羣情之大擾獨奮龜著之見贊成金石之交朝陳悟主
之一言夕獲和戎之五利宣帝納呼韓之款賴蕭傳之
通經太宗用房喬之謀資杜公之善斷俄躋近弼出撫
全秦王侯咸授於指蹤封拜得專於承制釋俘歸敵遐
方深得於歡心罰罪賞功諸將願輸於死力名聞草木
功在鼎鐘暨零雨以言旋將作霖而是命俄軫劬勞之
痛稍稽考慎之圖甫免私艱亟分閭寄輕裘緩帶擁油
幕以臨藩淑旂綏章趣鋒車而入覲嘉猷既告睿眷彌

隆一開日月之明再契風雲之會對賈誼於宣室不問
鬼神留姚崇於渭濱非由馳遂遂復青氈之舊進陪黃
閣之崇碩德既升太平可必基命宥密方攄廟算之奇
疇咨登庸行正台階之拜某夙希附驥近獲登龍謬承
特達之知許借吹噓之力掃門已晚尚及曹參之在齊
結綬有因喜見貢公之輔漢豈止係當時之輕重盖尤
關小民之戚休望舟楫於江干日遲行色伺絲綸於轂
下側聽除音成命忽傳歡悰曷既剡書薦墨雖未騰北

海之章羈旅窮愁寧久索東方之米

通樓樞密啟

揚清激濁誠先達之高風出幽遷喬亦後生之雅志欲
赴功名之會必由上下之交若矜其位而矜其能孰為
之先而為之後是固交相求而一致豈容化於道而兩
忘聲氣苟同卑高曷問所以附翼攀鱗之喻著自聖門
彈冠結綬之談誇乎信史絕足繼騰於王路清芬藹著
於遺編逮五交之繫既萌致三適之功無取上之人偷

安富貴弗憂英俊之沉下之人自負才猷恥藉王侯之
勢方圓不合秦越相懸魁竒卓犖者滅跡而無聞讒諂
阿諛者乘時而得肆比周無愧勢利相先曲意取容不
但奴顏而婢膝抵巇競進有同人面而獸心賢才之路
用埋市道之風滋扇克敦薄俗必屬偉人幸公道之有
歸披鄙誠而自列伏念某衣冠寒族庠序晚生蹉跎踰
不惑之年連蹇抱數竒之歎賢關肄業半生白首之經
仁路抗顏一紀紅塵之吏曩策名於桂籍因濫吹於芹

宮坐客無羶舉家食粥瘦馬空存於六印沈舟坐閱於
千帆齒髮摧頽老先期而驟至聲光湮沒世與我而相
違安寂寞於冷官分棲遲於選調既異蘋蘩之可薦甘
同桃李之無言曷嘗低欲就之頭未省搖乞憐之尾恥
嗟來而得食宵詭遇以獲禽然而樂善公卿久要故舊
或加力於收拾或陰借於吹噓歲律再更剡章四上惟
浮圖之未合恐獲落以無容譬如為山九仞尚虧於一
篲宛在中泚一壺何啻以千金敢於軒檻之前輒效頑

金之躍恭惟某官術優王佐學擅儒宗九德在躬表臣
隣之冠冕羣書滿腹粹師友之淵源昔居韋布之間已
負經綸之氣暨逢興運驟閱華塗西掖代言高掩常楊
之譽北扉視草密叅頗牧之謀允兼文武之資果注安
危之意樞柄進登於二府使星出耀於三秦遣鄧禹於
關中威名響震分召公於陝右德化流行幕府言旋介
圭入覲方鼎梅之欲命忽風樹以纏悲甫終祥禫之期
遂受蕃宣之寄陞隆名於祕殿委重鎮於陪都細柳兵

閒甘棠訟簡修山陰蘭亭之故事題鏡湖秦望之新詩
顧惟良弼之求方資帝賚第恐袞衣之詠難緩公歸佇
鳳詔以出綸催鹿車而當軸阿衡一世陶冶羣材蓋事
君以仁者衆夙仰於皇猷而薦賢報國者時正宜於今
日方將掩東海以取垂天之翼決西江而迎涸轍之魚
使菁莪歌樂育之仁而棫樸頌能官之美搢紳屬望巖
穴傾心至如踈逖之蹤尤切依歸之素擬作韓門之弟子
未窺孔氏之門牆非不能連草三書漫懷一刺請竇長

公之介紹假郭有道之題評因舍人而見曹參為門客
而干延壽高山流水固可覲於知音明月夜光懼或逢
於按劍今者塗經大府謁入高門瞻周公几几之儀驚
漢相堂堂之表謙冲下逮顧盼生光季路初來已有升
堂之望曹交受業思為假館之留時在可言義難自棄
用忘固陋仰冀甄收蓋得其所歸燕雀猶知於賀厦翔而
後集鷦鷯豈妄於巢林士雖居窮約之中身亦擇棲投
之地若非盛德敢借餘光素微半面之知且乏游談之

助輒輸肝膽便勾齒牙視古人則進退以無嫌在今世
為狂愚而可笑處已如此期公謂何或明附驥之心願
借連黿之手鷄鳴狗盜既下客以兼收蟲臂鼠肝庶大
鈞之永託

謝孫參政舉改官啟

闕鑄顏之治久荷私恩飛薦禰之章復塵公舉愚衷積
感弱質增榮竊以輔政之臣安危所係舉賢之任出處
惟均在朝則委以官人去國而猶令進士靡論中外皆

得薦揚非如監司郡守之有拘故所需者廣加以祠官
散員之許用故欲得者多自非俊傑之材不在題評之
目如某者稟資最陋賦命多奇祈柳巧而莫酬驅韓窮
而不去小不能披堅執銳奮身行陣之前大不能排難
解紛効力功名之會徒耽末學分作迂儒陸沈一世之
間雌伏百僚之底偶緣科第濫處膠庠坐客無羶舉家食
粥誨諸生於館下每虞譏笑之興集三鱸於堂前豈有
升遷之望敢期僥倖忽被甄收此蓋伏遇某官盛德格

天嘉猷濟世欲大恢於相業故廣攬於人材粉澤帝圖
有咸熙之庶績陶鎔士類無不獲之一夫致使寒微亦
膺記錄其敢不激昂氣節淬礪猷為雖功名富貴以難
期庶用舍行藏之無愧雞鳴狗盜已叨座下之收蟲臂
鼠肝更賴大鈞之播

謝樓樞密舉改官啟

泮水育材苟幸曠療之免銓曹考課冒膺秩序之更受
命知慙撫躬曷稱竊以陟黜幽明之典廢士始惰功綜

核名實之政衰人斯濫進惟吏部改官之制推本朝立法之嚴積以錙銖較以毫髮一言不應累善無容倘小節之弗完亦前功之盡廢雖聖世於焉而得士然姦胥或得以舞文視賂賄之重輕為行移之淹速故難於應格喻同進士之登科而計所輸貲至此富人之入粟與於此者不亦難哉如某者太學陳人中原冷族專心弱歲絕尼父之韋編刻意前修紉屈平之蘭佩早塵世賞旋竊文科免從州縣之游猥玷師儒之選董惟常下馬

帳空懸媚學有徒冠履漫同於聚蚋好書成癖簡編殆
類於蠹魚玩華丹於法度之言振鼓吹於京師之作飯
蔬飲水樂亦在中乘馬從徒茲非其幸博士虛糜於廩
粟廣文何有於才名逮此終更敢希平進忽因公舉得
廁京聯資品敝升始正有官之號歲時馴致式階通籍
之榮僥倖若茲夤緣有自此蓋伏遇某官至誠樂善偉
度包荒觀其廣攬於英才蓋欲大恢於賢業吹噓不倦
無非有味之言馨歎所加便作知名之士推轂每先於

寒遠登門不問於故新雖云無用之資亦借曲成之力
重念某與時齟齬賦性疎庸久處窮塗分無長物知匪
蘋蘩之可薦自甘桃李之無言比黷舍之三年偶剡章
之四上方浮圖之尖未合恐濩落之瓠無容續正賴於
鸞膠棄有同於雞肋輒輸肺腑用勾齒牙不待先容亟
蒙重諾箭俄飛於燕將璧遂假於許田大廈將顛功獨
支於一木中流獲濟賜何啻於千金成此叨逾悉由特
達某敢不欽承至意銘著乃心儒有古人與稽願堅操

履士為知己者死誓報私恩

上高司業啟

棘園較藝塵師匠之權衡泮水傳經記儒宗之領袖久矣執鞭之願闕然釋菜之儀瞻德表於無階搖心旌而甚切輒效小人之竿牘自通夫子之門牆流水高山既荷知音之素夜光明月必無按劍之疑緬維賢士之關敬仰哲人之範得英才而教育樂在其中有神物之扶持吉无不利恭惟某官行純金玉操厲冰霜九德在躬

植賢能之冠冕羣書滿腹粹師友之淵源曩游庠序之
間已負公卿之望文高紙價業邃書帷郭泰居三萬人
中獨為稱首何蕃餘二十年久孰敢駢肩迨升俊造之
科遂際休明之運懷鉛抱槧容與石渠含香握蘭進趨粉
省率由直道荐歷華塗屬臻偃革之期載闢明倫之地
爰資模楷式正本原肇新首善之規誕舉成均之訓生
徒濟濟風化洋洋出斯文埋沒之餘振吾道陵遲之後
聲華愈茂眷注彌隆博古通今入勸邇英之講分章摘

句兼陪資善之游極妙選於一時聳榮觀於多士后夔
之教胄子正賴全材伊尹之格皇天終躋大用某遠依
輝庇尚占冷官既榮華袞之褒敢緩空函之達攀鱗附
翼久潛顏子之心結綬彈冠更效貢公之喜方凝寒之
在候悵崇仞以猶賒願保冲襟益膺殊寵

除博士謝宰相啟

糾教法於賢關茂聞善狀正官聯於講席忽奉恩綸就
列無堪循名有覲竊以四海淵源之自蓋本成均六經

訓詁之傳實由博士明人倫而在是列天象以昭然平時固號於才難文治尤嚴於德舉得見君子斯可矣否則學者無述焉如某者業謝師承體非儒雅只緣幸會偶誤甄收屬當首善之興遂造羣英之末典司規矩豈諧寬猛之宜校閱藝文莫贊公明之考繼下帷而政事每非座以懷慙敢期寡聞無約之資乃冒久假不歸之寵此蓋遇某官至明燭隱大度包荒修禮樂於小雅盡廢之餘洪基圖於炎政中微之後雷破山而風振海壯

矣悒懔鳶戾天而魚躍淵妙哉橐籥故雖綿薄亦被生
成惟詞章視一世以汗隆而國學為四方之楷式變齊
魯以至道欣盛世之已純逃揚墨而歸儒恨斯文之未
副既公去取必絕愛憎恃直道之方行冀狂瀾之可復
某敢不勉思博約確守靖共譬彼鑄金德難酬於大冶
用諸攻玉質徒愧於它山

上湖州王侍郎啟

持甘泉之荷橐久藉論思分刺史之竹符用均勞逸朝

辭輦轂夕見吏民方幕府之初開諒鈴齋之有暇中和
布政豈弟宜人罄雅俗以交歡納多祥而茂擁恭惟某
官宏材拔萃奧學逢原早懷康濟之心適際休明之運
致君業履許身稷契之間經世文章接踵班張之後自
延登於法從益展盡於嘉猷獻納居多風規愈厲誠心
樂善力收當世之滯淹直道立朝無愧平生之出處頃
厭承明之直往分聖主之憂君相永懷悵莫留於益友
湖山動色喜乍得於詩人暫辭紫禁之烟花聊賞白蘋

之風月昔張燕公出臨江夏益妙篇章元丞相來守山
陰盛傳酬倡才因景發地與人宜矧苔雪之名邦得風
騷之太守凝清香於宴坐出小隊於郊坰凡歸一詠之
品題莫匪四并之逸樂然而疆鄰北闕職寓西清忠精
夙簡於天衷治行俄騰於日下專城雖美前席可期屈
處厚於盛山雖無欣戚試望之於馮翊難緩登庸某猥
以庸虛誤蒙知獎方承麻於德宇忽遠迹於恩闕設祖
帳於都門恣傾朝士望仙舟於河上獨後諸生

回第三人陳學士啟

賜第宸廷聯名鼎甲傳玉音而申諭藹桂籍以生光恭
惟某官經史淹該文詞瞻蔚卓爾功名之志見於議論
之英以貨為郎欲獻相如之賦隨計詣闕果蒙漢武之
知殊科收摘領之功絕技有中眉之恨高名始唱實居
季孟之間故事攸拘遂處王楊之後昭聲華於白日開
塗轍於青雲某頃預有司獲觀大對收象犀之實本自
因人擅龍虎之稱徒欣得士過紆盛服貺以長綫佩謙

德之光亨增鄙情之感激

回第四人莫學士啟

獻賦春闈試言天陛屈一時之髦士連處上游知萬選之高文難虧定價恭惟某官青雲令器白雪高標氣涵茗雪之清光射斗牛之上閨門競秀蔚珠樹以連三場屋先登擅桂枝而擢一金聲既振紙價隨高以五千言宏偉之詞叅二三子巍峩之選雲衢自致肯屈身世賞之延天澤驟加遂脫跡銓曹之冗某比窺大對深歎雄

才搏虎捕龍敢角衰殘之力擢犀拔象坐收奇偉之觀
徒得雋以為榮顧知音而何有乃迂都騎貺以長牋感
幸惟深敷陳莫罄

荆門軍到任謝宰相啟

分符出守託異縣以須才懷綬之官入黃堂而視事自
惟非據深用靡遑伏念某賦性迂踈稟資駑下幸逢聖
世獲廁儒林朝暮齏鹽久享詩書之樂春秋霜露每懷
松楸之思惟此小邦密隣故里輒效一麾之請遂成三

徑之歸上谷遺風比鄉閭而甚類兒童塵跡尋泉石以
都迷朋舊歡迎妻孥交慶服總從事方有改葬之圖上
冢申哀允便過家之舉獲從私願實出優恩此蓋伏遇
某官盛德格天元勲繼世接下必期於自盡包荒靡見
於遐遺憫茲流落之蹤惟深懷土察見顛蒙之守粗可
牧民故於粉社之旁畀以竹符之寵生成甚力銘刻何
言某敢不俯體眷憐力圖報効養生送死而無憾既曲
遂於身謀愛人利物之謂仁當仰鈞於德施

與襄陽吳帥啟

一麾出守誤膺民社之分十國為連獲託藩垣之庇遭
逢有幸喜愧惟均伏念某章句鄙生膠庠舊物值聖主
崇儒之運充賢關講藝之員倚席五年同擅藿鹽之樂
懷家萬里每深松楸之悲乃眷此邦實瀕故里服總從
事欲為改葬之圖上冢申哀可辦過家之舉來承人之
得便已私此蓋伏遇某官雅量鎮時英猷濟物聳搢紳
之重望膺君相之深知紅旆碧油暫領上游之重丹墀

青瑣行趨中禁之嚴敢謂衰蹤竊依輝蔭矧惟編籍實
寄部封自宋之滕方慕賢侯之政維桑與梓庶修雅什
之恭

答潭州陳帥啟

紅旆入疆已建元戎之幕朱轡至郡復交太守之章封
部載歡江山改觀恭惟某官才猷通敏德器恢宏術應
變以無窮治所臨而有績折衝借重坐宣樽俎之威來
暮興歌行有袴襦之效某偶因使事獲託官聯攬轡登

車方採風謠之美賜金增秩式觀政化之成曾修慶之
未遑忽貽緘之先及其為感愧罔既敷宣

賀劉運判除祕閣升副使啟

申錫帝綸就升使節載聯榮於華閣爰增峻於外臺郵
置初傳輿情胥悅恭惟某官器資宏博識度疏明裕然
康濟之才偉矣富強之術宜九重之眷注付一道之將
輸南方為財賦之淵本幹旋之有道東壁乃圖書之府
見寵畀之非常益茂膚公徑躋法從某屬當郡寄欣觀

除音阻修慶於賓閣敢寓詞於書尺

通樓樞密啟

去公府之潭潭游更歲月仰台符之兩兩杳隔雲天久
塵庠序之官每負簡書之畏名姓用疎於記室精神徒
結於門牆惟時輔弼之良夙茂經綸之業祠庭偃息方
益聳於具瞻神物扶持宜厚膺於純嘏恭惟某官才高
人傑道契天民獨兼文武之資蚤注安危之意玉堂詔
令追爾雅於二京油幕韜鈴折遐衝於四國一攀鱗翼

再秉樞衡屹然柱石之擎炳若著龜之斷允當大任果
濟中興佐佑成王君與協周公之化謀謨貞觀房喬推
如晦之籌旋抗封章懇辭機政體恤特深於睿眷股肱
稍逸於賢勞遊綠野以娛神侶赤松而訪道屬四海作
霖之望爭覩十行副九重審象之求佇臻三入某儒流
晚進鈞播微生曩騰光範之書獲厠翹材之館輪囷見
器初無蟠木之容踊躍自言遽入洪爐之鑄遂脫身于
選調繼列職於行都靜言卯翼之私恚自齒牙之借知

已之深恩未報古人之大節奚論克謹操修恐辜提獎
比在淵源之地屬經寒暑之時司訓誥以非才日虞官
謗念松楸而自請叨假軍麾尚飄萍寄之蹤未及瓜期
之代窘饑寒之方急執洒埽以無階管蒯至微永託卿
雲之蔭潢汙雖遠終期滄海之歸茲炎赫之在辰宜保
綏之加意亟被賜環之名式隆調鼎之功

荆門得替經從湖北謝陳漕啟

小壘終更已屢遷於月律先塋輒埽方祗赴於天朝遠

泛江濤經從治所行有趨參之幸不勝欣抃之私恭惟
某官與學家傳宏猷世濟踐揚南北雅擅於能名綿歷
歲時益精於治道頃一麾而出守俄五袴以騰聲果被
褒嘉就司飛輓上游憂顧聊宣力於外臺中禁論思行
致身於當路某欽風滋久慕德無窮解職雖前猶借二
天之庇登門在即已輕萬戶之封

回瀘南晁安撫啟

祇奉恩綸顯膺名節輕帆滾滾將修入覲之容芳翰諄

諄重講相違之義情文交厚衰耄有光恭惟某官才術
開明文華瞻博三紀宦游之久一時物論之歸游歷侯
藩政績高於數郡遄分帥閫威聲振於百蠻簡隆眷以
彌深罄嘉猷而無隱行寘論思之列盡攄經濟之圖某
正理行褒將安真館欣覩追鋒之命阻陪銜舳之游寔
遠英標莫卜瞻承之路側聆新渥嗣馳贊喜之緘

賀呂總領啟

光膺帝制進直郎曹以計省之華資總師屯之重寄恭

惟某官家傳奧學世濟宏猷風流標王謝之姿政事處
由求之右朱轡出守藹承流宣化之聲玉節觀風勵激
濁揚清之志誕布九重之德澤聿蘇萬里之瘡痍凋瘵
息肩姦賊落膽惟武昌之列戍據全楚之上游供億是
資傾天下轉輸之半顧憂允賴當禁中奏報之繁自非
君相之腹心曷注軍民之耳目果膺妙柬就畀雄權足
食成軍方資於良筭庇民尊主行奮於嘉謨某久託餘
光持蒙異顧感恩私而結戀聞除命以馳神

謝范漕啟

小壘分符猥承人之外臺飛奏重愧已知載省凡材曷
勝公舉竊以漢刺史六條問事察二千石為最詳唐採
訪十道得人領三百州而得要惟是守臣之能否實繫
部使之否臧免督責以為難豈薦論之可覲如某者稟
資至薄涉世多奇仕雖本於為貧志亦希於行道老而
不試每疑所學之無庸力非自量妄意為邦之或勉比
從黷舍得請軍麾甘沉迷於簿領之中親瑣碎於米鹽

之末術因臨事方知賈誼之疎政在愛民更覺陽城之拙惟資餘潤冀免大訶敢期氷鑑之明忽誤蘋蘩之薦此蓋伏遇某官英猷濟物絕識過人登車遠繼於家風持橐行儀於禁路發奸擿伏推政事之神明激濁揚清判人倫之溼涓顧如庸鄙雅荷眷知雖衰遲流落以無堪辱撫育矜憐而益厚居然幸會託在按臨持公法而優以私恩取寸長而護其尺短不惜齒牙之論將令羽翼之成自視歛然何以得此某敢不益修操履仰副吹

噓死者有知應感撫孤之義永以為好終輸報德之誠

湖南提舉到任謝宰相啟

假檐帷而出使復去門牆馳軺傳以之官已臻封部情
深戀德感切歸恩伏念某流落孤生艱窮薄命久託洪
鈞之播初無蟠木之容入忝膠庠出分符竹養生送死
既畢遂於身謀葺垢納汙每曲蒙於情恕施等天地仁
均父師茲小壘之代還遽外臺而擢授察其稍盡心於
從事故驟而寵以使華憐其方竊祿以為生故趣使就

其官次惟是書紳之誨尤多提耳之言約以禮博以文
恍聞韶而忘味厲之名引之美比贈袞以踰華負荷知
恩遭逢乃爾茲蓋伏遇某官言成典誥動契神明距詖
行而放淫辭士風丕變開誠心而布公道王化無偏致
令寒遠之蹤重戴生成之賜某敢不服膺哲訓悉力公
程有地酬知豈此身之足惜指天誓報庶它日以無慚

通問湖北陳總領啟

叨奉宸恩濫將使指入部封而交事託麻庇以知榮恭

惟某官雅量鎮時宏才絕俗宣化藹惟良之譽觀風無
太察之苛升郎部之華資總師屯之重寄上游餉餽已
寬聖主之憂中禁論思行遣從臣之列顧惟踈冗特荷
眷知靜思忝竊之由實有吹噓之自星軺承乏顧何取
於澄清雲蔭垂休庶可逃於曠斥凝寒在候吉履具宜
冀妙養於冲和用亟臻於寵渥

欽定四庫全書

海國圖志
卷十一

三

欽定四庫全書

漢濱集卷十二

宋 王之望 撰

啓

潼川漕謝宰相啓

糜廩食於湘濱已幸命節將轉輸於梓部載誤恩綸揣
分無堪冒榮有覩竊以總利權於一道外臺推漕計之
繁次地望於四川左蜀號益都之亞分三銓而選吏權
萬井以通商粵自軍興仍多邊費四海既臻於康泰一

方未省於征求上軫顧憂遠加寬卹雖事為之制經講
畫之已明然存乎其人要推行之盡善必得異能之士
庶知協濟之方如某者賦性甚迂理財素昧比玷光華
之選日惟深曠之虞典食貨以裕民曷裨良法宣詔條
而撫俗茂布深仁幸憑覆護之慈未抵譴訶之域忽驚
申命靡俟終更專重寄於一司補缺員於五稔惟是久
虛之選宜陞不次之才敢謂踈愚乃承空乏此蓋伏遇
某官神功不測元化難名有一德以享天心允任大臣

之重使萬民而正王面每勤膚使之求致若孤蹤亦叨
器使其敢不更殫夙夜益守靖共外竭力於一官冀無
大戾內矢心於九死必報洪恩

賀湯樞密啟

光膺詔綽進長機庭肆國家偃武之時專廊廟本兵之任
九重屬意四海蒙休恭惟某官間世真儒累朝宿望蘊
潔靜精微之學成彌縫輔贊之功茲萬化之更新賴一
臺之糾正直而不倨抗謹論以回天公爾忘私推誠心

而格物能使薄夫敦而懦夫立大臣法而小臣廉暨登
參貳之司益展經綸之效惟時樞筦實亞台階府並列
於東西班迭陞於先後事分軍國制自祖宗曩戎事之
繁興命相臣而兼領勢成偏重權覺寢輕屬當威柄之
申遂復章程之舊副茲德選可謂才難果崇體貌之隆
式厚腹心之委基命宥密方資惟幄之竒謨明弼諧行
運陶鈞之化某猥將使指逖聽綸音夢繞門闌雖阻伸
於慶謁言形竿牘姑少見於歡悰冬序正中廟謀多暇

願精調於鼎食用下副於巖瞻

潼川憲到任謝宰相啟

久叨餉餽之司曾無政績就易平反之任不改撫封命
節增華汗顏有覲伏念某早專樸學晚抗塵容橫經首
善者始終五年隨牒外方者俛仰十稔一紆守綬三假
使輶比將漕以充員適勵精之更化輕徭薄賦務宣布
於深恩激濁揚清式欽承於休德豈但轉輸之輒辦必
期凋瘵以兼收使巴山萬里之遙如甸服一圻之內至

於剷除民蠹禁戢吏姦力雖倍以何功心愈勞而更拙
徒依庥庇未被譴呵敢圖瘝曠之餘亦玷陶鎔之末飛
芻輓米既辭計事之煩攬轡登車仍正職司之秩叨逾
已甚稱塞維艱此蓋伏遇某官道貫王猷功熙帝載名
世乃聖人之過求賢真宰相之方為楠為杗校羣材而
並用采葑采菲收片善以無遺顧若踈愚誤膺知獎每
自慚於譎薄尤重費於生成謂涪潼之間固已粗諳於
摩撫則刑獄之寄或能上體於哀矜因俾敘遷實為僥

倖某敢不益殫夙夜勉副使令叱馭輸忠庶家風之未泯
捐軀效報豈國士之難追

賀沈丞相加恩啟

勒成國典光被廷綸粵躋錫位之官併衍加封之戶陶
鎔所及鼓舞惟均恭惟某官盛德熙天嘉猷濟世雅多
材而多藝誠有德而有言尊主庇民行堯舜文王之道
屬辭比事合稷契臯陶之謨茲者圖慶系於璿源述睿思
於寶訓聿煩上宰獨總宏經實資指授之勤克善條流

之制簡編沓上粲星緯以爭光品秩增崇覺台階之愈峻某官常是守班慶莫違作一經而垂無窮仰歎股肱之懿懷萬方而褒有德益欣體貌之隆暑氣方炎恩閱正遠願精調於鼎餼用下答於巖瞻

成都運使到任謝宰相啟

石渠寓直遽參英俊之遊玉壘將輸復貳光華之選寵榮重沓感愧交併伏念某稟賦凡庸見聞單淺隨牒今逾於二紀乘輶遍歷於諸臺頃按刑書未周歲籥雖粗

殫於夙夜曾何取於涓埃敢期責實之朝乃冒踰涯之
寵懷鉛抱槧通仙籍於蓬山輓粟飛芻耀星芒於井絡
漕權既重地望彌高矧擇副以尤難常空員而弗置膺
茲優擢必屬異能忽併誤於褒遷實自驚於叨竊此蓋
伏遇某官道遵皇極學探帝謨蘊大任之英姿輔中興
之盛烈賢材廣攬已收多士之心利澤遠施深軫四方
之慮精求庸使猥及迂儒察其體國之誠未嘗沽虛名
而乏調度知其愛民之意不肯越經賦而橫征求似於

公私取予之間稍識利害輕重之理是以委之劇部秩以清資用伸勸勵之規以起衰頹之意其敢不咨詢民瘼宣布君仁期不負於使令庶少逃於罪戾然而盤根錯節衆謂難圖綿力薄才豈能宏濟非大造曲加於假借則孤蹤必至於顛隕播以陶鈞既荷生成之賜緩其銜勒更希覆護之慈載厚德以無窮隕微軀而何有

賀工部楊侍郎啟

顯膺宸旨進貳冬官偉法從之得賢致公朝之增氣凡

居廕賴舉切欣愉恭惟其官器宇端方性資凝重文章
雅健傳古作者之心政事通明為世吏師之首宦海久
騰於雋譽士流咸仰於老成星使觀風布九霄之德澤
月卿銜命寬四蜀之征徭果深前席之思亟奉賜環之
詔對揚丹陛洞契清衷既正位於通班造躋榮於近侍
雍容禁橐暫資獻納之勤密勿政塗佇奮弼諧之蘊某
久睽英範欣聽除音夷路載陞蠅敢希於附驥宏規可
繼狗徒幸於續貂

與沈夔帥啟

忝軺使以西征方趨遠部勤館人於東道已近雄藩睇
幕府以非遙通記曹而可後恭惟其官宏材絕俗厚德鎮
浮紫橐朝持密從甘泉之幸金蓮夜對親承翰苑之華
遽厭直於承明遂分符於井絡俄膺宸詔進領帥權委
寄既隆猷為益著八命作牧聊借重於蕃宣一札成文
行趣歸於輔贊某頃居學省嘗託官聯悵別德之何賒
忽承顏之在邇驅馳峻阪敢辭叱馭之勞瞻望光儀預

切登龍之喜

與荆南劉太尉啟

牙纛有光坐控江湖之固門墻在遠久疎竿牘之修獨
有傾依實勤夙夜恭惟某官資兼文武學富古今挺不
世之竒才負濟時之大畧執干戈而衛社稷早信敵國
之威閱禮樂而敦詩書方倚長城之重功書彛鼎聲振
華區任千里之蕃宣寬九重之憂顧位陞掌武貴已並
於疑丞任付本兵謀即攄於帷幄某馳驅蜀道荏苒歲

華自東徂西叨誤恩之三錫以勤補拙無善狀之一毫
悵衰病以何堪愧吹噓之有素朔風戒候台履具宜願
加謹於保綏用仰承於眷注

賀成都王制置啟

光膺明綍出擁高牙井絡折衝聳全蜀上游之寄河圖
寓直冠西清次對之聯除目一傳輿情大慰恭惟某官
才猷英特學術縱橫昔居韋布之間早負經綸之志軒
墀射策追晁董以爭衡禁省代言掩常楊而專美眷坤

維之謀帥申巽命以任賢獨當真主之知粵副元戎之
選輟論思於近侍寬憂顧於遠民一劄細書丁寧德意
萬釘寶帶焜耀身章載頌內帑之貲庸視中朝之寵惟
疏恩之特異知注意之逾深紅旆碧油權暫專於玉壘
紫樞黃閣名即啓於金甌某衰晚無堪馳驅何補當年
傾蓋已輕萬戶之封指日承顏方借九河之潤

賀成都王制置開藩啟

重閩需賢坤維就鎮擁麾幢而入境開幕府以建牙凡

託部封孰不歡慰恭惟某官資兼文武學通古今自得
雋於賢科即受知於明主登崇甚峻天下想聞其風眷
注彌深漢廷無出其右茲從近侍來撫上游謀帥得人
頓覺雪山之重忘身徇國豈辭蜀道之難草木莫不知
名烟雲為之改色列城企踵冀六毒之遄征多士私憂
恐一封之趣召某司存有守迎候未遑賀履輸誠已記
曹之是浼披雲自幸傾行旆以尤勤淑氣漸融征途尚
遠願益加於保謹用上副於倚崑

與宮使孫左司啟

登車出使載誤於明恩叱馭之官已交於賤事顧惟叨
冒實自吹噓恭惟某官學貫九流才高一世擅政事文
章之美凝功名富貴之姿東觀南宮早騰於闕步北門
西掖衆指於通津一為畫錦之行屢謁昔襦之頌求舊
已喧於朝論均勞難戀於仙祠行慶褒嘉入躋禁近某
夙叨真賞久闕英風賦袖阿房感特深於衡鑑檄傳巴
蜀身尚遠於門墻趨丈席以何時臨尺書而獨寫嚴寒

在候台履具宜異妙養於沖襟用亟膺於召節

賀宰相正啟

月正孟陬聿新於天敘律旋太族肇建於人正諒一德
以奮庸有百神之敷祐恭惟某官功牟垓北德配堪輿
轉一氣於鴻鈞調四時於玉燭咸和海宇永措俗於春
臺光輔基圖方過期於周歷履歲端之伊始偕天步以
同休某遠備外臺阻趨公府捧椒觴而獻壽莫效微誠
仰台彩以馳心徒傾善頌

與寄居范都運啟

叨膺中制猥備外臺駕軺傳以載驅欣門墻之漸邇恭
惟某官精忠許國絕識邁時以一世之能臣為四方之
膚使暴公子威名聳震魏弱翁治行流聞久爾倦游暫
茲均逸士訟王尊之去上疏相先帝思張敞之功起家
在即某夙聯末契最荷殊知頃一障以分符偶二天而
託庇過蒙眷寵得就涓埃懷盛德以惟深喜餘麻之復
借登車澄按方師孟博之風倒屣逢迎敢辱仲宣之顧

嚴寒在候吉履宜冀妙養於沖襟用倚須於召節

賀楊侍郎啟

光膺天寵進貳夏卿偉法從之得賢舉朝廷而增重凡
居庥庇孰不忻愉恭惟某官學有淵源德無瑕類才出
萬夫之上身兼數器之長崑玉桂枝早擅無雙之價石
渠金匱悉窺未見之書既郎宿以高騰亦使星之屢遣
不汲汲於功名之際每恢恢乎出處之間宣室召還蘭
臺入筵益締楓宸之眷亟陞荷橐之華勸講經帷主盟

帝學豈但侍臣之高選實窮儒者之光榮禁闈雍容已著論思之效巖廊密勿行攄輔佐之功某久聞英風忽聞新命高閣展敬干寅謁以無階尺牘馳誠通記曹而可後

賀陳察院啟

拜命樞庭陞華栢寺正人登用公議交孚恭惟其官卓識離倫英姿邁往宏材周於時務奧學貫於經邦鼓篋賢關夙騰於妙譽影纓仕路久屈於遠圖既涵養之愈

深宜聲稱之彌卽果回淵鑒過被寵光亟躋六察之聯
允極一時之選雍容憲府暫資直諒之猷密勿禁途佇
展論思之益某喜聞成命邈在遐方懷漫刺於門墻阻
伸慶謁達空函於几格但切懽悰

又

顯奉宸恩榮陞臺察國有正臣之進人知直道之行綸
綍始頒搢紳交抃恭惟某官性資剛大德履方嚴學洞
聖經博貫九流之蘊才周世用旁通萬變之微久矣軒

昂茲焉遇合既特深於隆眷爰允賴於忠言糾正官聯
暫假風猷之峻論思禁路載觀賢業之崇其備使遐陬
欣聞成命匏瓜有守望賓廡以無階罕牘馳誠通記曹
而敢後

通趙給事啟

振翼垂光仰風流之有日抗塵走俗披雲霧以無階敢
憑尺牘之修用致寸誠之戀恭惟某官宏材絕等奧學
逢源井絡飛英追淵雲而接武天庭摘藻揖晁董以齊

驅擢自清衷亟躋華貫鐘鼎成而重輕莫揣圭璋御而
溫潤有加粹然大雅之資允謂中興之瑞丹墀青瑣已
密侍於景光黃閣紫樞行峻膺於大任某偶承人乏濫
假使華叱車馭於邛峽承顏未卜侈里門於高密慕德
徒深春氣將殘辰休茂擁願益加於綏養期上荅於眷
知

賀陳樞密啟

光膺帝綽進貳樞庭凜人傑之既升覺朝廷之增重衣

冠歆豔介胄歡呼恭惟某官韶濩正音鼎鐘偉量冠賢
科而自致儀禁路以橫翔聲華行實之隆曷追前哲獻
納論思之益密簡清衷獨高專對之才三建出疆之節
蓋聖心之注意欲鄰國以知賢借此時將命之行示他
日折衝之寄使華旋返天寵驟加以四海之儒宗本一
朝之兵柄基命宥密方資帷幄之籌謨明弼諧行正陶
鎔之任某雅叨眷獎欣聽登庸大厦崇成阻造潭潭之
府餘光遠借徒瞻兩兩之星寒律方嚴政機多暇願順

節宣之理用承考慎之圖

賀沈制置啟

渙號肆頒坤維作鎮九重念遠暫勞牙纛之臨萬里知
歸咸起袴襦之詠先聲所暨羣聽具孚恭惟某官識照
幾微學優康濟日光玉潔燦然經世之文岳峙海涵允
矣絕人之德蚤中異科之日亟陞清禁之班中外游更
險夷一致陳賈生治安之策憂有甚於積薪本陸贄仁
義之言逐寧辭於棄梗逮著已然之效咸推先見之明

亟膺宣室之思小屈淮陽之卧上方惠顧全蜀圖回中原欲遠控於上流遂擢專於大閫盡護諸將庶幾獎率於三軍兼撫列城豈特招徠於八國即正機衡之任益隆鼎鼐之勳其違德積年朔風有日驅車梁雍飽諳劔棧之危回首岷峨頓覺雪山之重

太府少卿四川總領到任謝宰相啟

貳列卿於外府猥廁廷紳董經賦於上游仍將使指省躬曷稱拜命知榮伏念某少本拘儒老為俗吏偶明時

之幸會乃煩使之屢更去朝初自於乞麾入蜀繼叨於
移節驅馳九載綿歷五司雖殫夙夜之勞幾有涓埃之
效薦蒙增秩比復賜環雷電取將已下仙官之敕蓬瀛
且至却回方士之船渙號申頒訓詞溢美亞班聯於七
寺之長督餉餽於六師之屯引私諱以有陳觸報聞而
莫避凌兢就列顛仆是虞茲蓋伏遇某官先覺真材具
瞻碩輔以尊主庇民之術行推賢進善之心名一藝者
必庸用廣攬英豪之士無大故則勿棄尤曲敦負賤之

交至若衰遲特勤記錄推挽之恩極矣不進弗休撫存
之意溫然有加未已重慚涼薄倍費生成某敢不仰體
眷思更鞭駑蹇交修食貨權四路之盈虛兼裕軍民俾
一方之帖泰庶上寬於憂顧次少荅於陶鎔

回彭州馮守啓

恭承詔綍載綰郡章振都騎以之官合左符而宣化恭
惟某官文傳正氣識造大方議論縱橫達今昔安危之
變聲名赫奕推西南人物之英果勤側席之思荐被賜

環之詔已揚舲而趣召邁抗疏以求歸特畀牧民俾行
素學暫布中和之政佇還清切之聯過沐謙冲曲垂音
問感藏彌切濡染奚殫

回杜殿院啟

一鶚上騰方慚於僭率雙魚遠覘殊佩於謙光執禮甚
恭捫心有覲恭惟某官學優經濟識造幾微謹論忠言
為一朝之藥石深仁厚澤歌千里之袴襦既聲實之交
孚諒功名之可必淮陽卧治聊資汲黯之行宣室興思

即有賈生之召某徒懷慕用未覲風規與大夫僕而同
升非能引類知柳下惠而不立實懼貽譏至煩導諭之
勤尤重過情之愧凝寒在候福履具宜更冀保綏前膺
寵渥

賀朱參政啟

光奉宸恩進陪國論真儒得位寰宇均歡恭惟某官迪
德誠明凝姿敦大深探道奧會先聖不傳之心洞達時
宜殖當今有用之學夙奮經綸之蘊荐升華顯之途憲

府繩違正一臺之綱紀露門勸講闡六藝之淵源精忠
彌結於主知公輔久虛於物望果承天眷入秉政機必
將下膏澤以醇四海之風恢遠圖而永萬世之業躋民
仁壽正位鈞衡輿誦所歸斯言可復某謬蒙薦寵欣聽
登庸雖邈在坤維莫遂踵門之志然仰承晉接尤深賀
厦之誠霜令載嚴冲襟多裕願謹谷神之衛以符巖石
之瞻

賀周樞密啟

顯膺綸制進貳樞庭增聖朝道德之威壯天下安榮之勢
幘幪所及慶抃交深恭惟某官德量恢闔天資英偉學
探聖域妙致知格物之功才又王家兼緯武經文之畧
早蒙異眷徧閱華途瑣闥論思凜有回天之力玉堂播
告昭然煥斗之章當敵國之尋盟馳單車而遠聘掉舌
端之三寸重國體於萬鈞載酬仗節之勞遂付本兵之
寄基命宥密方資帷幄之竒謨明弼諧即正台衡之任
某久叨庇賴欣聽登庸大厦崇成阻造潭潭之府餘光

遠借徒瞻兩兩之星寒律方嚴政機多暇願茲節宣之
理用承考慎之圖

賀楊參政啟

顯膺詔綽榮預政機海宇同休簪紳共慶恭惟某官學
造聖賢之妙氣鍾天地之和騰茂蜚英展也萬人之傑
廉貪立懦卓哉一世之師蓋嘗推難進之風將以厚有
為之業比及勵精之日果勤側席之思爰增重於蓬山
即升華於荷橐批敕獨高於夕拜司戎旋擢於夏卿秘

殿橫經既極名儒之選禁林視草尤符內相之稱上方
加考慎之圖人皆謂登庸之晚茲進陪於揆路實簡在
於淵衷以旦夕承弼之良為左右股肱之助子儀徹樂
已聞清德之孚淮南寢謀坐有折衝之效竝見白麻之
出益昭黃閣之尊某逖在遐方欽聞休命台符兩兩徒
仰睇於餘光公府潭潭願永依於大廈

賀吳宣撫啟

九重注意載頒渙汗之新四蜀分憂就付宣威之重華

區震疊廟社真安恭惟某官智勇兼資勲名夙著三紀
壯西南之翰一門據忠義之誠蓋神明默扶子儀俾再
造於王室而軍中素畏李牧不敢犯於邊陲膺具禮於
齋壇視多儀於揆路分統連營之盛旋陞亞保之崇顧
凌烟之像未極於形容而太常之銘屢勤於記述兵欲
藉上游犄角之勢公獨得中原歸附之心故宏建於高
牙庸盡護於諸將昔岑彭馮異闡方面之號而衛青去
病開幕府之雄茲聞兄弟之迭居足為古今之盛美况

司徒之子公武嘗進壁於淮堧太傅之姪謝玄亦陳師
於淝水豈特功業一時之會實係國家萬世之休某久
託餘輝欣聆成命簡書有守莫躬賀履之私調度斯興
當叶同舟之力

賀洪尚書啟

顯膺宸綍入踐禁林司九天告命之嚴極四海文儒之
選搢紳艷寵翰墨光榮恭惟某官識度邃明材猷魁傑
學貫六經之蘊詞追兩漢之醇蚤擢異科亟蒙殊獎代

言西掖兼常揚體制之精典選中臺振裴馬銓衡之譽
物望滋峻主知益深若時內相之崇超出廷臣之右演
綸攄思豈特資潤飾之功跋燭承恩實有賴謀謨之助
矧惟世掌可謂才難匪茲特立之英孰副非常之舉備
玉堂之顧問已契淵衷贊金鉉之變調竚陞政路某遠
銜使指欣聽除音雖注目雲霄莫遂登門之志然傾心
墻仞尤深賀履之情春氣肇新冲襟多裕特茲保綏之
節用欽考慎之求

謝虞尚書啟

總軍賦於上游曾徵善狀正卿聯於外府更玷殊恩揣
分量以過優揆才能而弗稱覲顏拜命撫已知慚伏念
某涉道迂疎稟資蹇拙少嘗策勵頗妄意於清流老厭
馳驅嗟寢成於俗吏比承人之久掌利權屬敵衆之
鷓張奮王師而鷹擊輸將粗繼皆朝廷訓勅之明恢復
是期乃將帥經營之畧雖備殫於五技初無補於一毫
方虞曠職之誅遽沐懋官之寵靖惟僥冒寧蔑寅緣茲

蓋伏遇某官成德閎深較才超邁鵠鵠乎不可尚已載
書竹帛之雋功休休焉其如有容常借齒牙之餘論遂
令渥洽猥及庸虛某遲頓罔堪叨逾實甚投閒置散每
興林壑之思含垢匿瑕猶賴幘幪之庇

謝吳宣撫啟

總軍賦於上游曾徵善狀正卿聯於外府更冒殊恩顧
薄陋以何堪匪吹噓而曷致恭惟某官忠誠許國智勇
出倫臨戎整暇而恩威並行料敵精深而竒正迭用內

全蜀漢民恃若長城之安外掃咸秦兵行如疾雷之震
等差功伐愛惜貲儲憐其潦倒之蹤假以揄揚之助遂
令獎渥誤及庸虛某荷寵若驚懷歸甚切江湖未返久
借潤於靈河鐘漏已殘尚分光於宵燭

通問呂經畧啟

叨膺宸命濫假使權瞻封部以非遙修緘滕而敢後恭
惟某官材標國器業紹家風既妙簡於隆知遂寢更於
繁使登車攬轡藹膚使之聲名足食成軍寬上游之憂

顧惟桂林之重鎮扼銅柱之遐陬謀帥為難得公而重
碧油紅旆聊資鎮撫之良青瑣丹墀行奉論思之直顧
惟疎冗特荷照知方一障以分符偶二天而託庇過蒙
眷獎得就涓埃每深盛德之懷復幸芳鄰之接六條問
事揣綿力以何堪十國為連冀餘光之可借歲寒在候
台履具宜期茂養於冲襟用亟臻於寵渥

賀黃給事中啟

被命紫宸陞華青瑣公朝推重士論獲伸恭惟某官杞

梓良材圭璋偉器粹然心學窮六籍之淵源允矣躬行
作諸儒之標的盤錯素施於游刃險夷不失於正塗夙
膺當宁之思首及賜環之詔彌綸省闈獨高詳整之稱
糾正刑書深體哀矜之意勸講輔光明之盛獻言資啟
沃之勤惟時封駁之司久虛夕拜必取端方之士庶展
辰猷載疇已試之能宜備即真之寵謀王體而斷國論
固所優為熙帝載而亮天工佇膺大用某邈居遐俗側
聽新除夢遶門闌雖阻伸於慶謁言形竿牘姑少見於

於歡悰

賀楊給事中啟

寵膺綸制起拜瑣闥仍露門勸講之官兼翰苑代言之
職凡居庥庇舉切忻愉恭惟某官韶濩正音鼎鐘偉量
粹稟岷峨之秀養深江海之源宣和大比者一萬人獨
擅無雙之譽炎祚中興者三十載尚堅難進之風比宣
室以召還冠蘭臺而寓直進持從橐入侍經筵借模範
於儒宗作典刑於胄子英聲茂實藹然清議之歸碩畫

嘉猷卓爾淵衷之契爰課論思之效遂陞封駁之司擢
自帝心震於朝路豈但就批於黃勅更資播告於白麻
選妙一時榮傾多士益者三友已增帷幄之光弼予一
人行運陶甄之化某猥司煩使遠聽除音懷漫刺於門
墻阻仲慶謁達空函於几格徒激歡悰

賀黃樞密啟

顯膺綸告進貳樞庭增皇朝道德之威壯天下安榮之
勢播紳屬目介胄歸心恭惟某官才入王家學探聖域

文章醇正參垂世之格言識慮昭融富經邦之奇蘊
亟蒙睿眷游歷華塗資管轄於都曹職論思於憲部露
門勸講開陳默契於淵衷瑣闥繩愆封駁允符於公議
上方奮乾健以清六合廓離明以燭九幽必使運帷幄
之籌如數記而龜卜用能靖兵戈之侵使瓦解而冰消
倘非真賢孰濟興運贊宥密之命精神已見於折衝司
造化之權輔相行觀於藏用某肅將隆指欣頌除音邈
在遐陬阻遂登龍之志仰傾潭府徒深賀燕之誠春令

正妍靈襟多裕願謹鼎茵之節式符巖石之瞻

賀吳宣撫陞招討啟

命敷綸綍益隆委寄之恩地控關河盡付威懷之柄傳
聞中外聲聳華戎恭惟某官幾鑒絕人勲名盖世勇無
與敵曾收百戰之功智有餘忠深被九重之眷懋齋壇
之寵數總環列之師屯爵命增崇峻處三孤之秩皇靈
宣布獨分四蜀之憂眷秦晉之奧區稔祖宗之遺澤江
山牢落久淪戎馬之區父老咨嗟常晞日月之照上方

振規恢之長策公能奮經濟之遠圖特畀重權庸清大敵有指疆土豈惟伐獫狁而至太原克詰戎兵必將封狼居而臨瀚海某久蒙輝潤欣誦詔除屬限官常阻遂轅門之謁仰伸慶問敢稽尺牘之馳

遠迎奉使虞尚書啟

銜命九重遠撫雍梁之域抗旌萬里近臨參井之墟士民屬目以歡呼將卒傾心而踴躍恭惟某官器全酬酢學富經綸夙推開濟之才聿際亨嘉之會受知聖主徧

歷清塗督戰淮淝既運籌而取勝宣威隴蜀將傳檄以
收功行書竹帛之勲入總樞機之柄某久違英範辱在
下風猥限匏瓜已失爭先之覩載馳竿牘益深仰止之
高

賀川陝宣諭虞尚書啟

位登八座任重七兵以六官常伯之尊膺一面信臣之
遣凡居庥庇舉切歡愉恭惟某官浩氣凌雲宏才絕類
雄文奧學得江漢之洪深直節高標等岷峨之峻拔驟

躋華貫動契清衷珥筆螭蚴妙極一時之選演綸鳳掖
炳同三代之風當聖哲馳騫之秋罄侍從論思之益方
采石收功於耆定乃古梁抗志以經營宣國威靈諭王
德意召公分陝聊專二伯之權裴度平淮即晉三司之
貴某辱知最厚藉蔭甚周蘇代使秦正賴餘光之振相
如告蜀行遵偏檄之馳

通宮使蘇尚書啟

羽儀中禁久欽名德之高冠冕西州滋仰人門之峻瞻

台閣而其邇通記府以爭先恭惟某官與學逢原宏材
絕俗斯文不墜自承家世之傳直道而行益聳朝廷之
望罄論思於天陛典禮樂於春官一去近班三臨巨鎮
樂鄉閭之均逸辭藩府以旬歸東道角巾曲徇高人之
志西清荷橐就陞學士之聯顧側席以方勤恐賜環之
在即某外臺忝竊左蜀將輸叱馭而來方竭馳驅之力
披雲未卜徒傾慕用之誠寒律正嚴沖襟尚遠願更綏
於福履以嗣拜於恩光

賀湯中丞啟

出綸西掖正位中司海宇傳聞共喜真賢之進簪紳屬望益知清議之伸凡仰光塵舉深慶抃恭惟某官稟資鯁亮造道精微煩使屢更著三朝已試之績孤忠自結當萬乘非常之知召自祠庭真諸憲府出聖神之獨斷首公正以親除選重青囊聲高白簡惟百辟之承式保一臺之得人國家虛大夫之官以中執憲而為長聖主重言路之責必古遺直之是求自非拔俊良於頓挫之

中何以振風采於陵遲之後果膺帝簡實慰民瞻佇追
慶厯嘉祐名臣之蹤用復景德祥符希世之治應龍相
感雲霧滃然而從猛獸有威藜藿為之不採鈞衡之正
朝夕可期某濫使遐陬欽承新命一鶚直上仰搏擊以
高翔二蟲何知欣逍遙而竊庇炎歊猶劇啟處具宜願
加謹於保綏以上當於注倚

賀汪中丞啓

出綸西掖正位中司旒冕虛心寄霜威於言路簪紳屬

目仰風采於公朝凡託帡幪舉深慶抃恭惟其官性資
直亮德操剛方學貫經邦達聖哲幾微之蘊識通正體
明古今理亂之原自親擢於臺端尤力禔於廟算豪強
膽落諛佞魂驚致國勢之愈尊實帝衷之倚重骨鯁既
孚於上意精神坐折於遐衝屬專席之簡求跨亨衢而峻
陟應龍御極雲霧滃然而從猛虎在山藜藿為之不採具
瞻有素爰立可期某邈處遐陬欽聆休命喜而不寐知清
議之方伸斐然成章愧鄙悰之莫盡秋天澄肅憲府靖嚴

願加謹於保綏庶祇承於眷注

賀吳宣撫陞少傅啟

命下廣庭爰懋庸公之報寵頒異數特陞亞傅之尊中
夏聳聞軍民胥悅恭惟某官勲庸盖世智畧兼人身蔽
坤維著威名於三紀志存王室挺忠義於一家屬強敵
之侵陵任元戎而敵愾投醪勵衆咸思奮臂以登先破
竹乘機孰不望旗而遠遁併克關山之險一清徼塞之塵
既偉績之彌高宜隆恩之沓至益峻三孤之秩中陪多

邑之腴上眷有加既已極褒遷之典公心無斁必將恢
久大之功丕展壯猷嗣迎殊渥某夙蒙輝潤欣誦詔除
屬限官常阻遂轅門之謁仰伸慶問敢稽尺牘之馳

賀汪參政啟

顯擢真儒榮參大政綸言誕布丕昭帝眷之隆輿誦僉
諧允副民瞻之峻庇庥所及慶抃交增竊觀歷代之盛
衰皆係輔臣之臧否誠得元弼始收雋功未有用無竒
之才而能辦非常之事况聖哲馳騫之歲匪國家閒暇

之秋毫釐晷刻之差患遺寰宇錢穀甲兵之間日至廟
堂必資名世之英斯展經邦之績天祐明聖時登俊良
恭惟某官識洞古今量涵清濁中和稟粹渾然九德之
資精密窮微遂以六經之蘊曩由公道自結主知三院
階陞凜風霜於百辟一臺坐正肅儀軌於萬方衆論攸
歸上心彌簡屬邊塵之犯順持使節以宣威勢壯荆吳
奮周瑜之雄畧忠輸淮蔡驗裴度之嘉謀人皆曰賢政
將焉往折衝有賴已書竹帛之勲注意既深即迅鈞衡

之拜其欣聞新渥阻造崇墉應龍翔而雲霧興竚須霖
雨之下大厦成而燕雀賀永依柱石之穹溥暑尚煩靈
襟多裕期茂加於調護庸宏濟於艱難

賀同知張樞密啟

寵膺詔綽起贊事樞肆國家右武之秋居廊廟本兵之
地精神所聚形勢自張竊惟聖賢出處之方必順天地
盈虛之數卓然慷慨謹爾行藏奉身而退則視富貴如
一毫之輕投袂而來則使社稷增九鼎之重在我初無

於得喪於時乃係於安危熙運重開元勳再入恭惟某
官德尊碩輔學粹鉅儒忠誠表於四朝問望光於百辟
三仕無喜孰窺特立之心萬鍾何加獨養至高之氣早
聯近侍最號名臣後生咸仰其風流當世久希於膏澤
逮真人之繼紹屈巨哲以登庸允賴壯猷克寧雅俗趣
召走貂璫之使給扶優軒陞之儀任隆股肱恩極體貌
一夔足矣知公論之僉同二老歸之信敵情之率服偉
哉用江左之傑信爾寢淮南之謀惟具瞻之既孚豈爰

立之可緩基命宥密暫煩惟幄之籌謨明弼諧行正鈞
衡之拜某遠叨將指側聽除音夢逸門闈雖阻伸於慶
謁誠馳竿牘姑少見於歡悰

